

Na osnovu člana 23. stav (1) i člana 24. Zakona o Sudskoj policiji Bosne i Hercegovine ("Službeni glasnik BiH", broj 3/03 i 21/03), ministar pravde donosi

PRAVILNIK

O MJERILIMA I NAČINU UTVRĐIVANJA ZDRAVSTVENE SPOSOBNOSTI PRIPADNIKA SUDSKE POLICIJE BOSNE I HERCEGOVINE

Član 1. (Predmet)

Ovim Pravilnikom propisuju se mjerila i način utvrđivanja posebne duševne i tjelesne sposobnosti (u daljnjem tekstu: zdravstvena sposobnost) koju moraju ispunjavati:

- a) kandidati za prijem na poslove u Sudskoj policiji Bosne i Hercegovine (u daljnjem tekstu: Sudska policija);
- b) pripadnici Sudske policije.

Član 2. (Ustanova za ocjenu zdravstvene sposobnosti)

Zdravstvene preglede koji prethode ocjeni i mišljenju o zdravstvenoj sposobnosti, u pravilu, obavlja zdravstvena ustanova s kojom Ministarstvo pravde Bosne i Hercegovine (u daljnjem tekstu: Ministarstvo pravde) zaključuje ugovor u skladu s propisima o javnim nabavkama (u daljnjem tekstu: ovlaštena zdravstvena ustanova).

Član 3. (Mjerila za utvrđivanje zdravstvene sposobnosti)

(1) Mjerila zdravstvene sposobnosti za osobe iz člana 1. ovog Pravilnika koja čine uvjet za obavljanje poslova pripadnika Sudske policije, zdravstvena ustanova utvrđuje na osnovu ljekarskog/zdravstvenog pregleda koji obuhvata:

- laboratorijske nalaze: SE, KKS, ŠUK, urin, urea, kreatinin, holesterol, trigliceridi, transaminaze, bilirubin u krvi;
- RTG pluća (na osnovu mišljenja ljekara specijaliste - prema potrebi);
- okulistički pregled;
- ginekološki pregled (za žene);
- neuropsihijatrijski pregled;
- psihološko testiranje;
- internistički pregled EKG;
- kardiološki pregled s UZ srca;
- ORL pregled s audiometrijom;
- ocjenu radne sposobnosti spec. medicine rada sa zaključnim mišljenjem;
- izvještaj o izvršenim pregledima.

(2) Zdravstvena sposobnost kandidata za prijem na poslove u Sudskoj policiji utvrđuje se na prethodnom zdravstvenom pregledu na osnovu mjerila iz stava (1) ovog člana.

(3) Zdravstvena sposobnost pripadnika Sudske policije na redovnom sistematskom kontrolnom pregledu, te vanrednom kontrolnom pregledu utvrđuje se mjerilima iz stava (1) ovog člana prilagođenim prirodnom opadanju pojedinih funkcija u skladu sa životnom dobi i radnim stažom pripadnika Sudske policije.

Član 4.
(Dodatne pretrage i pregledi)

Osim pregleda navedenih u članu 3. stav (1) ovog Pravilnika, a u zavisnosti o indikacijama, ovlaštena zdravstvena ustanova može preporučiti obavljanje dodatnih pretraga i pregleda i to najčešće radi: psihijatrijskog, psihologijskog, internističkog, fizijatrijskog, ginekološkog ili neurološkog pregleda, odnosno obavljanja RTG pretrage, ergometrije, ultrazvučne pretrage određenih organa, EEG pretrage, izuzimanja vlasi i vještačenja istih radi utvrđivanja prisutnosti droge u organizmu i drugo.

Član 5.
(Ocjene zdravstvene sposobnosti)

- (1) Zdravstvenu sposobnost osoba iz člana 1. ovog Pravilnika, na osnovu obrade koju je obavila, ovlaštena zdravstvena ustanova ocjenjuje ocjenom "sposoban" ili "nesposoban".
- (2) Zdravstvena ustanova može dati ocjenu "potrebno daljnje liječenje" za pripadnika Sudske policije za kojeg se utvrdi da nije moguće donijeti ocjenu iz stava (1) ovog člana zbog liječenja koje je u toku i za pripadnika Sudske policije za kojeg se utvrdi da je potrebno započeti s liječenjem.
- (3) Ocjena se dostavlja organizacionoj jedinici nadležnoj za kadrovske poslove Ministarstva pravde.

Član 6.
(Rokovi)

- (1) Redovna provjera zdravstvene sposobnosti sudskih policajaca obavlja se jednom u dvije godine.
- (2) Rok iz stava (1) ovog člana počinje teći od datuma na posljednjoj ispravi o sposobnosti koju izdaje nadležna zdravstvena ustanova.

Član 7.
(Organizacija obavljanja zdravstvenih pregleda)

- (1) Pripadnici Sudske policije dužni su pristupiti sistematskom kontrolnom pregledu u rokovima utvrđenim članom 6. ovog Pravilnika, kao i vanrednom kontrolnom pregledu kada to zatraži nadležni rukovodilac ili nadležni ljekar primarne zdravstvene zaštite.
- (2) Organizaciju provođenja, kontrolu i evidenciju pravovremenog obavljanja zdravstvenih pregleda obavlja zapovjednik Sudske policije u saglasnosti sa sektorom Ministarstva pravde nadležnim za kadrovske poslove.

Član 8.
(Posljedice negativne ocjene)

- (1) Zdravstvena ustanova će ocijeniti nesposobnim pripadnika Sudske policije kod kojeg utvrdi bolest, stanje, povredu ili njihovu posljedicu, odnosno tjelesni nedostatak koji je prepreka za uspješno obavljanje konkretnih poslova u Sudskoj policiji ili kada postoji kombinacija više kontraindikacija koje zbirno čine prepreku za rad na povjerenim poslovima u Sudskoj policiji.

(2) U slučajevima iz stava (1) ovog člana, pripadnik Sudske policije će se obratiti odgovarajućoj zdravstvenoj komisiji koja je ovlaštena da procjenjuje zdravstveno stanje zaposlenih osoba, te će se dalje postupati u skladu sa zakonskim propisima iz oblasti radnih, zdravstvenih ili drugih propisa u tijelima uprave u Bosni i Hercegovini.

Član 9.
(Stupanje na snagu)

Ovaj Pravilnik stupa na snagu osmog dana od dana objavljivanja u "Službenom glasniku BiH".

Broj 05-02-3-12055/10
3. novembra 2010. godine
Sarajevo

Ministar
Bariša Čolak, s. r.